



Persónuverndarstefna

ALMENNT

Hnit verkfræðistofa hf. (hér eftir „Hnit“ eða „verkfræðistofan“) hefur einsett sér að tryggja trúnað, áreiðanleika og tiltækileika persónuupplýsinga í hvívetna.

Í persónuverndarstefnu þessari er því lýst hvernig Hnit vinnur með persónuupplýsingar. Öll vinnsla Hnits á persónuupplýsingum fer fram á grundvelli laga nr. 90/2018 um persónuvernd og vinnslu persónuupplýsinga („persónuverndarlög“).

Með persónuupplýsingum er átt við allar upplýsingar sem hægt er að rekja til tiltekins einstaklings. Hér má nefna upplýsingar á borð við nafn, kennitölu, heimilisfang, símanúmer, netfang, myndefni, netauðkenni, samskipti, bílnúmer og fleira. Í 2. tl. 1. mgr. 3. gr. persónuverndarlaga er nánar tilgreint hvað fellur undir hugtakið „persónuupplýsingar“.

Með vinnslu á persónuupplýsingum er átt við aðgerð eða röð aðgerða þar sem unnið er með persónuupplýsingar. Sem dæmi um vinnslu á persónuupplýsingum má nefna söfnun þeirra, skráningu, varðveislu, breytingu, miðlun, notkun, skoðun og fleira. Í 4. tl. 1. mgr. 3. gr. persónuverndarlaga er nánar tilgreint hvað fellur undir hugtakið „vinnsla“.

ÁBYRGÐARAÐILI

Ábyrgðaraðili við vinnslu persónuupplýsinga er sá aðili sem ákveður tilgang og aðferðir við vinnsluna. Hnit er ábyrgðaraðili á vinnslu persónuupplýsinga hjá verkfræðistofunni.

Samskiptaupplýsingar Hnits

- Hnit verkfræðistofa hf.
- Háaleitisbraut 58-60, 108 Reykjavík
- S: 570 0500
- hnit@hnit.is

FRÁ HVERJUM SAFNAR HNIT PERSÓNUUPPLÝSINGUM?

Hnit safnar í flestum tilvikum persónuupplýsingum frá þeim aðila sem persónuupplýsingarnar varða. Í ákveðnum tilvikum safnar Hnit persónuupplýsingum frá þriðja aðila og reynir Hnit eftir fremsta megni að upplýsa viðkomandi um það.

HVAÐA UPPLÝSINGAR VINNUR HNIT OG HVERS VEGNA?

Upplýsingar sem tengjast verkefnum sem Hnit kemur að

Hnit vinnur ýmis verkefni sem verkfræðistofa og þarf óhjákvæmilega að vinna persónuupplýsingar um starfsmenn viðskiptavina í þeim tilvikum. Persónuupplýsingar sem Hnit vinnur um framangreinda einstaklinga eru:

- Tengiliðaupplýsingar, svo sem nafn, símanúmer og netfang.

Tilgangur vinnslunnar er að Hnit geti sett sig í samband við tengiliði viðskiptavina vegna verka, reikningagerðar, o.fl.

Heimild til vinnslu persónuupplýsinga byggir á lögmætum hagsmunum, sbr. 6. tl. 1. mgr. 9. gr. persónuverndarlaga.

Upplýsingar um starfsmenn samstarfsaðila og undirráðgjafa

Hnit vinnur persónuupplýsingar um starfsmenn samstarfsaðila og undirráðgjafa sem verkfræðistofan fær til sín á grundvelli samnings við framangreinda aðila. Samstarfsaðili sendir inn eftirfarandi persónuupplýsingar um starfsmenn sína sem Hnit heldur utan um:

- Tengiliðaupplýsingar, svo sem nafn, sími og netfang.
- Upplýsingar um starfsreynslu, menntun og hæfi.

Tilgangur vinnslunnar er að hafa yfirlit og ut anumhald um starfsferil, menntun og hæfi starfsmanna samstarfsaðila og undirráðgjafa.

Heimild til vinnslu persónuupplýsinga byggir á lögmætum hagsmunum, sbr. 6. tl. 1. mgr. 9. gr. persónuverndarlaga.

Hafa samband í gegnum heimasíðu

Hægt er að senda inn skilaboð í gegnum heimasíðu Hnits, www.hnit.is. Einstaklingar geta sett inn eftirfarandi persónuupplýsingar:

- Tengiliðaupplýsingar, svo sem nafn og netfang.
- Skilaboð.

Tilgangur vinnslunnar er að auðvelda samskipti.

Heimild til vinnslu persónuupplýsinga byggir á samþykki, sbr. 1. tl. 1. mgr. 9. gr. persónuverndarlaga.

Tölvupóstsamskipti

Einstaklingar geta alla jafna sent okkur tölvupóst ef þeir hafa spurningar í tengslum við starfsemi verkfræðistofunnar. Í þeim tilvikum er Hnit nauðsynlegt að vinna með eftirfarandi persónuupplýsingar:

- Tengiliðaupplýsingar, svo sem nafn og netfang.
- Samskipti.

Tilgangur vinnslunnar er að auðvelda samskipti og halda utan um tölvupóstsamskiptin.

Heimild til vinnslu persónuupplýsinga byggir á lögmætum hagsmunum, sbr. 6. tl. 1. mgr. 9. gr. persónuverndarlaga.

Starfsumsóknir

Einstaklingar geta sótt um starf hjá Hnit og er í þeim tilvikum nauðsynlegt að vinna með eftirfarandi persónuupplýsingar:

- Tengiliðaupplýsingar, svo sem nafn, kennitölu, heimilisfang, símanúmer og netfang.
- Menntun og reynslu.
- Upplýsingar frá skráðum meðmælendum þegar við á.
- Aðrar upplýsingar sem eðlilegt er að komi fram í ferilskrá og kynningarbréfi.

Tilgangur vinnslunnar er að taka á móti umsókn um starf og meta hana með tilliti til þess starfs sem sótt er um.

Heimild til vinnslu persónuupplýsinga byggir á undanfara samnings, sbr. 2. tl. 1. mgr. 9. gr. persónuverndarlaga.

Skilaboð í gegnum Messenger og LinkedIn

Einstaklingar geta sent fyrirspurn í gegnum Facebook eða LinkedIn síður Hnits en síðurnar eru til staðar til að auka sýnileika verkfræðistofunnar. Í þeim tilvikum að einstaklingar senda skilaboð er nauðsynlegt að vinna með eftirfarandi persónuupplýsingar:

- Notendanafn.
- Mynd (þegar mynd fylgir notendanafni).
- Skilaboð.

Tilgangur vinnslunnar er í markaðssetningar- og upplýsingaskyni.

Heimild til vinnslu persónuupplýsinga byggir alla jafna á samþykki, sbr. 1. tl. 1. mgr. 9. gr. persónuverndarlaga.

MIÐLUN PERSÓNUUPPLÝSINGA TIL ÞRIÐJA AÐILA

Hnit notast við rafrænar lausnir frá þriðja aðila sem auðvelda verkfræðistofunni að halda utan um og miðla upplýsingum. Eigendur lausnanna kunna að hafa aðgang að persónuupplýsingum. Hnit gerir þá ávallt vinnslusamning við viðkomandi þjónustuaðila í samræmi við persónuverndarlög. Slíkur samningur kveður meðal annars á um skyldu hans til að gæta fyllsta trúnaðar, tryggja öryggi og fara eingöngu með persónuupplýsingar í samræmi við fyrirmæli Hnit.

Í ákveðnum tilfellum kann Hnit að vera skylt samkvæmt lögum að deila persónuupplýsingum með þriðja aðila sem ekki er bundinn fyrirmælum verkfræðistofunnar um meðferð þeirra. Rétt er þó að taka fram að þeim aðilum er þó ávallt skylt að haga meðferð þeirra í samræmi við persónuverndarlög.

VARÐVEISLUTÍMI PERSÓNUUPPLÝSINGA

Hnit geymir persónuupplýsingar í þann tíma sem nauðsynlegt er fyrir verkfræðistofuna að hafa þær undir höndum. Þegar ekki er þörf fyrir Hnit að hafa persónuupplýsingar lengur undir höndum eyðir verkfræðistofan þeim með öruggum hætti.

RÉTTINDI ÞÍN

Þú nýtur ákveðinna réttinda samkvæmt persónuverndarlögum. Ef þú vilt neyta þessara réttinda þinna máttu hafa samband við okkur í gegnum netfangið hnit@hnit.is. Við höfum einn mánuð til að svara erindi þínu en getum framlengt frestinn um tvo mánuði ef beiðnin er sérstaklega umfangsmikil. Rétt er að taka fram að réttindi þín eru ekki fortakslaus og kunna að vera háð ákveðnum skilyrðum. Hér er að finna yfirlit yfir helstu réttindi þín:

Réttur til aðgangs. Þú átt rétt á að óska eftir aðgangi að þínum gögnum og fá afrit af þínum persónuupplýsingum.

Réttur til leiðréttingar. Þú átt rétt á að fá upplýsingar um þig sem eru rangar og ónákvæmar leiðréttar.

Réttur til eyðingar. Í ákveðnum tilfellum getur þú átt rétt á að þínum persónuupplýsingum sé eytt. Þetta á einkum við í þeim tilfellum þar sem upplýsingar eru ekki lengur nauðsynlegar, þú hefur andmælt vinnslunni, vinnslan reynist ólögmæt, eða ef vinnslan byggir á samþykki sem þú hefur afturkallað.

Réttur til að andmæla vinnslu. Byggi vinnsla á persónuupplýsingum á lögmætum hagsmunum, og þú telur að hún brjóti gegn grundvallarréttindum þínum, þá getur þú andmælt vinnslunni. Við hættum þá vinnslunni nema við sýnum fram á ríkari hagsmuni af því að halda henni áfram.

Réttur til takmörkunar á vinnslu. Í eftirfarandi tilfellum átt þú rétt á að við stöðvum vinnslu persónuupplýsinga:

- Ef þú véfengir að persónuupplýsingar séu réttar (þar til við getum staðfest að þær séu réttar).
- Vinnslan er ólögmæt, en þú vilt ekki að persónuupplýsingunum sé eytt.
- Við þurfum ekki lengur á upplýsingunum að halda en þú þarfnast þeirra til að hafa uppi, stofna eða verja réttarkröfu.
- Þú hefur andmælt vinnslunni og við höfum ekki bent á ríkari hagsmuni af því að halda henni áfram.

Réttur til að afturkalla samþykki. Í þeim tilfellum þar sem við byggjum vinnslu á samþykki þínu er þér ávallt heimilt að afturkalla slíkt samþykki. Afturköllun á samþykki þýðir þó ekki að vinnslan sem fór fram áður en samþykki var afturkallað sé ólögmæt.

Réttur til að leggja fram kvörtun hjá Persónuvernd. Teljir þú að ekki sé farið með persónuupplýsingar þínar í samræmi við persónuverndarlög átt þú ávallt rétt á að leggja fram kvörtun hjá Persónuvernd (www.personuvernd.is).

ÖRYGGI PERSÓNUUPPLÝSINGA

Hnit hefur gripið til tæknilegra og skipulagslegra öryggisráðstafana í því skyni að tryggja viðunandi öryggi persónuupplýsinga. Aðgangsstýringar eru að kerfum og húsnæði verkfræðistofunnar. Öryggisráðstöfunum þessum er ætlað að vernda persónuupplýsingar gegn því að þær glatist, breytist, verði birtar eða aðgangur verði veittur að þeim í leyfisleysi.

ENDURSKOÐUN

Persónuverndarstefna þessi getur frá einum tíma til annars tekið breytingum í samræmi við breytingar sem verða á viðeigandi lögum og reglugerðum eða ef breytingar verða á því hvernig Hnit vinnur með persónuupplýsingar. Tilkynnt er um slíkar breytingar á heimasíðu verkfræðistofunnar, www.hnit.is.